

弘

簡

錄

弘簡錄卷之三

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之四 附天皇太后

中宗皇帝諱顯高宗第七子母則天皇后姓武氏諱顯年十四  
以色聞太宗選爲才人賜號武媚高宗爲太子入侍悅之會上  
崩命削髮爲尼居感業寺卽位又幸其寺因命蓄髮值王皇后  
無子與蕭淑妃爭寵后引內後宮以撓妃寵始進下辭降體事  
后后喜數舉於帝立爲昭儀顧幸反在妃右以素有權數詭變  
不窮寢與后異未有以中會生女后撫弄繞去潛斃之製衾下  
伺帝至陽喜發衾見死驚問左右云皇后適來顧帝不察怒爲  
真殺由是得售其讒愈信愛之始有廢后之意時加寵異進號

宸妃王后既廢李義府許敬宗表請正位中宮帝意決令李勣  
于志寧奉璽綬立爲皇后剏始羣臣命婦及四裔君長皆朝於  
肅儀門后自製外戚誡解釋譏諫逐死袁良無忌等寵煥赫然  
上自顯慶後多苦風疾百司奏事時令后決多稱上旨尤復城  
寓深邃柔屈不恥以就大事帝謂能奉已漸次參豫國政後上  
春秋漸高昏懦不事舉能鉗勒使不得專久亦不平麟德初召  
方士郭行真入禁中爲蠱祝帝怒命侍郎上官儀草詔廢之后  
號泣懇訴得釋待之如初許敬宗構殺儀政乃益歸房帷每視  
朝殿中垂簾偶坐生殺賞罰惟其所命當其忍斷雖甚愛不少  
靳也以後更爲太平文治大集諸儒於內殿譔定列女傳臣軌  
百僚新誠樂書等千餘篇令學士裁奏擬分宰相權遇早僞求  
避位不許羣臣更號爲天后益務外示寬裕劫天下人心使歸

於已上疏奏十二事勸農薄賦給復息兵禁浮省功廣言杜讒  
益京官廩伸百僚淹滯父在爲母服齊衰三年迄今行之帝將  
遜位於后郝處俊固諫乃止帝崩皇太子以甲子卽位尊爲皇  
太后臨朝稱制大赦庚午進韓王太尉霍王司徒舒王司空滕  
王開府儀同三司魯王太子太師越王太子太傅紀王太子太  
保甲戌劉仁軌爲左僕射裴炎中書令劉齊賢爲侍中戊寅魏  
玄同爲黃門侍郎岑長倩兵部尚書郭待舉同中書門下三品  
癸未郭正一罷

嗣聖元年春正月癸未改元癸巳立妃韋氏爲皇后擢后父元  
貞豫州刺史上欲拜爲侍中裴炎固爭上怒曰我以天下與元  
貞有何不可而惜侍中耶炎懼白太后密謀廢立二月戊午降  
帝爲廬陵王幽於別所更立豫王旦爲皇帝妃劉氏爲皇后子

成器爲皇太子大赦改元文明皇太后施縹紫帳御紫宸殿視  
朝劉仁軌陳漢臣后禍敗之事以申規戒出爲西京留守庚申  
廢太孫重照爲庶人殺庶人賢於巴州甲子帝率羣臣上太后  
尊號於武成殿丁卯臨軒冊嗣皇帝命武承嗣攝太尉王德真  
攝司空丁丑德真爲侍中劉禕之同中書門下三品夏四月癸  
酉遷廬陵王於房州丁丑又徙均州閏五月甲子武承嗣爲太  
常卿同三品秋七月戊午廣州崑崙殺其都督路元啟乙丑突  
厥寇朔州大將軍程務挺敗之辛未彗星見西北方長二丈餘  
經三十二日乃滅括州大水流二千餘家時四方爭言符瑞左  
丞馮元常以爲誣罔太后不悅出爲隴州刺史八月庚寅葬乾  
陵九月甲寅大赦改是年爲光宅元年旗幟尚白易內外官服  
青者以碧改東都爲神都尚書省爲文昌臺僕射爲左右相六

曹爲天地四時門下省爲鸞臺中書省爲鳳閣侍中爲納言中書令爲內史御史分左右肅政臺其餘悉以義類改之武承嗣請追尊武氏怒裴炎阻止已已追封五代祖克己魯國公諡曰靖妣裴氏魯國夫人高祖居常北平郡王諡曰恭肅曾祖儉全城郡王諡曰義康祖華太原郡王諡曰安成皆爲太尉考士護太師魏王妣趙氏劉氏宋氏楊氏皆爲王妃丁丑故司空李勣孫敬業舉兵揚州以匡復爲辭冬十月甲申遣梁郡公孝逸爲揚州道行軍大總管副以左金吾衛大將軍李知十率兵三十萬往拒敬業丁亥鸞味道儉校內史同鳳閣鸞臺三品李景諱同鳳閣鸞臺平章事壬辰敬業克潤州武承嗣誅裴炎與程務挺通謀下獄殺之太后怒召羣臣廷議曰朕於天下無負若等知之乎羣臣唯唯后曰朕輔先帝踰三十年憂勞天下爵位富

貴朕所與也天下安佚朕所養也先帝棄羣臣以社稷爲託今何見負之速有若裴炎仇忌難制有若敬業務挺甘爲戎首彼皆人豪不利於朕朕能戮之公等才過於彼願蚤爲之不然謹以事朕無詒天下笑羣臣頓首不敢仰視曰惟陛下命丁酉曲赦揚楚二州削敬業祖父官爵復其本姓貶劉齊賢辰州刺史罷李景謨以著作郎崔啓代之十一月辛亥再命黑齒常之爲江南道行軍大總管以助孝逸乙丑敬業爲其將王那相所殺來降丁卯郭待舉罷鸞臺侍郎韋方質代之十二月戊子遣御史巡察風俗癸卯殺程務挺於軍中

垂拱元年春正月太后臨朝丁未揚州平大赦改元二月乙巳以裴居道韋思謙同鳳閣鸞臺三品突厥寇邊左玉鈐衛中郎將淳于處平爲陽曲道行軍總管以禦之三月丙辰廬陵王復

遷房州辛未頌親撰垂拱格夏四月丙子貶竊味道青州刺史  
癸未處平敗績於忻州五月丙午裴居道爲內史丁未流王德  
真於象州己酉蘇良嗣守納言詔內外文武九品以上及百姓  
皆得自舉壬戌旱慮囚六月以韋待價同三品秋九月丁卯揚  
州地震生毛十一月癸卯出待價燕然道行軍大總管以擊突  
厥是歲阿史那元慶爲典昔亡可汗僧懷義白馬寺主二年  
春正月辛酉太后歸政皇帝奉表固辭復臨朝稱制大赦賜酺  
轉內外官勳免并州庸調終百姓身二月辛未朔日食后畏天  
下人心反逆詔許上變吏不得呵詰所在給食送京廩於客館  
三月戊申作銅匱受天下密疏東署延恩南署招諫西署伸冤  
北署通玄每日中書門下官一員典領自是天下多上變告夏  
四月庚辰岑長倩爲內史六月辛未蘇良嗣爲文昌左相韋待



賀文昌右相並同鳳閣鸞臺三品己卯韋思謙守納言冬無雪  
十月己巳有山出於新豐縣賜名慶山赦囚給復賜酺十二月  
狄仁傑爲冬官侍郎是歲突厥斛瑟羅爲繼往絕可汗三年  
閏正月丁卯太后臨朝封皇孫咸義恒王隆基楚王隆範衛王  
隆業趙王二月己亥旱山東河南大饑遣司屬卿王及善司府  
卿歐陽通并狄仁傑分撫之三月乙丑韋思謙罷裴居道爲納  
言夏四月蘇良嗣罷五月丙寅張光輔爲鳳閣侍郎同平章事  
庚午殺劉禕之秋七月丁卯冀州雌雞化爲雄乙亥京師地震  
廣州雨金八月壬子魏玄同兼納言交趾人李嗣仙殺安南都  
護劉廷祐據交桂二州司馬曹玄靜敗之突厥寇昌平及朔州  
燕然道行軍大總管黑齒常之擊敗之九月己卯虢州人楊初  
成自稱郎將迎廬陵王不克見殺冬十月庚子右監門衛中郎

將樊寶璧及突厥戰敗績十二月壬辰安息道行軍大總管韋  
待價及其副安西都護閻溫古山兵以擊吐蕃 四年春正月  
甲子太后臨朝西京立崇先廟以享武氏祖考庚午毀乾元殿  
命薛懷義董作明堂夏五月庚申武承嗣令雍州人唐同泰僞  
造瑞石文云聖母臨人永昌帝業表稱獲於洛水太后大喜號  
其石曰寶圖洛水爲永昌水擢同泰遊擊將軍六月丁亥朔日  
食汜水人復獻瑞石加上太后尊號爲聖母神皇作神皇聖郊  
見上帝以謝神貺秋七月丁巳大赦賜酺五日名寶圖曰天授  
聖圖立廟洛水側封其神顯聖侯置永昌縣改嵩山爲神嶽封  
其神天中王戊午京師地震八月戊戌神都又震時柄去王室  
宗室大臣撓不得逞韓魯等王合謀舉兵迎還廬陵王丙午琅  
邪王冲先發越王貞應之后遣大將軍左金吾丘神勣左豹韜

麴崇裕爲中軍岑長倩後軍皆爲總管張光輔諸軍節度往拒  
丙寅兵敗韓魯二王自殺霍王及黃國公譔范陽王肅江都王  
緒東莞公融與常樂公主咸坐誅乃大殺唐宗室子孫嬰襍皆  
流嶺南易其姓爲虺氏丁卯審味道王本立同平章事冬十月  
辛亥大風拔木十二月己酉神皇拜洛受圖帝及太子羣臣贊  
羹從壇所以次列大陳珍禽奇獸貢物鹵簿勒石壇左曰天授  
聖圖之表辛亥改明堂爲萬象神宮大赦是歲唐臣被殺者審  
味道及殷中監裴承先麟臺少監周思茂通事舍人郝象賢濟  
州刺史薛頴與弟駙馬紹

永昌元年春正月乙卯神皇親享萬象神宮改服袞冕搢大圭  
執鎮圭帝亞獻太子終獻合天地五方帝百神以高祖太宗高  
宗正配魏王士璣從配禮畢饗羣臣大赦改元賜酺七日戊午

布政九條於萬象神宮以訓百官改國號爲周二月丁酉置崇  
先府官加尊考曰周忠孝太皇妣楊氏周忠孝太后以文水墓  
爲章德陵咸陽墓爲明義陵祖周安成王曾祖魏義康王高祖  
趙肅恭王五代祖太原靖王妣皆王妃三月甲子舒王元名爲  
司徒癸酉武承嗣爲納言張光輔守內史夏四月甲辰殺汝南  
王瑋鄱陽公譚廣漢公謚汝山公蔡零陵王俊廣都公璿徙其  
家嵩州五月丙辰韋待價及吐蕃戰於寅識迦河敗績流之繡  
州己巳薛懷義爲新平道行軍大總管以擊突厥秋七月丁巳  
流紀王慎於巴州改氏虺戊寅王本立同鳳閣鸞臺三品九月  
庚戌殺恒山郡王承乾之子厥冬十月己未殺嗣鄭王璿等六  
人丁卯春官尚書范履冰鳳閣侍郎邢文偉同平章事十一月  
享萬象神宮以太穆文德配皇地祇引周忠孝太后從配改元

載初建用周正以十一月爲正月十二月爲臘月來歲正月爲  
一月自製十二字義更名墨改詔書爲制書封周漢裔爲二王  
後舜禹湯裔爲三恪乙未除唐宗室屬籍是歲朗與松州俱奏  
雌雞化爲雄殺唐臣鄧玄挺張光輔閻溫古劉齊賢洛州司馬  
房嗣業洛陽令張嗣明陝州參軍張嗣古流人徐敬真陝州刺  
史郭正一劉延景相州刺史張志元蒲州刺史張彭祖尚方監  
王令基侍郎魏玄同崔弼彭州長史劉易從梁州都督李光龍  
大將軍黑齒常之將軍趙懷節

天授元年春一月戊子王本立罷邢文偉爲內史武攸寧爲納  
言武承嗣文昌左相岑長倩右相薛懷義輔國大將軍與浮屠  
作大雲經言神皇受命事頒行天下甲午流韋方質於儋州二  
月策貢士於洛城殿貢士殿試始此三月乙酉旱減膳時將革命恐人

心不附大肆殺戮尚書王本立范履冰裴君道梁郡公孝逸石  
丞張行廉太常丞蘇踐言將軍阿史那憲耶中喬知之刺史柳  
明肅杜儒童縣令白令言皆被害秋七月辛巳流舒王元名於  
和州壬午殺豫章王廔丁亥殺澤王上金許王素節及諸子數  
十人辛未殺南安王潁鄴國公昭及諸宗室李直李敞李然李  
勳李策李越李黯李玄李英李志業李知言李玄貞九月乙亥  
殺鉅鹿郡公晃麟臺郎裴望并弟司膳丞璉又殺流人張楚金  
元萬頃苗神客韋方質壬午大赦改元賜酺七日乙酉加尊號  
聖神皇帝降帝爲皇嗣賜姓武氏太子爲皇孫丙戌立武氏七  
廟於神都追尊周文王始祖皇帝妣妣氏文定皇后墓號德陵  
四十代祖平王少子武曰睿祖康皇帝妣姜氏康惠皇后墓號  
喬陵太原靖王曰巖祖成皇帝妣成莊皇后墓號節陵趙肅恭

王曰肅祖章敬皇帝妣章敬皇后墓號簡陵魏義康王曰烈祖  
昭安皇帝妣昭安皇后墓號靖陵周安成王曰顯祖文穆皇帝  
妣文穆皇后墓號永陵忠孝太皇曰太祖孝明高皇帝妣孝明  
高皇后改章德陵爲吳陵明義陵爲順陵追封伯父及兄弟之  
子皆爲王堂兄爲郡王見任承嗣爲魏王三思梁王諸姑姊爲  
長公主堂姊妹爲郡主史務滋守納言宗秦客檢校內史傅游  
藝鸞臺侍郎同平章事令務滋等巡行天下改內外官所佩魚  
皆爲龜冬十月丁巳改文水縣爲武興縣世世給復如漢豐沛  
甲子置大雲寺封周公爲褒德王孔子爲隆道公二年冬正  
月親祀萬象神宮以始祖及考妣配改置社稷易服色旗幟皆  
尚赤改唐太廟爲享德廟四時祠高祖以下三室餘廢不享以  
武氏七廟爲太廟庚寅賜酺始用周臘春二月右丞周興有罪

流之嶺南夏四月壬寅朔日食列釋教於道法上僧尼居道士  
女冠前五月丁亥大風折木岑長倩爲武威道行軍大總管以  
擊吐蕃六月庚戌格輔元爲地官尚書鸞臺侍郎樂思晦鳳閣  
侍郎任知古同平章事秋七月庚午徙關內七州數十萬戶以  
實神都分京兆置鼎稷鴻宜四州八月戊申夏官尚書歐陽通  
爲司禮卿兼判納言事九月壬辰傅游藝有罪下獄死癸巳冬  
官侍郎裴行本洛州司馬狄仁傑爲地官侍郎同平章事是歲  
被殺大臣史務滋岑長倩歐陽通格輔元樂思晦將軍張虔暉  
張虔勗丘神勣衛蒲山李安靜奉御張行感刺史劉行寶劉行  
瑜雲弘嗣

長壽元年春一月戊辰楊執柔同平章事庚午貶任如古爲江  
夏令狄仁傑彭澤令流裴行本於嶺南乙亥殺右衛大將軍泉  
公南



獻誠庚辰司刑卿李游道爲冬官尚書同平章事二月戊午秋  
官尚書袁智弘同平章事三月五天竺國並遣使朝貢夏四月  
丙申日食大赦改元如意五月江淮旱洛水漂居民五千餘家  
河溢壞河陽縣禁天下屠殺採捕遣使巡問賑貸戊寅魏王承  
嗣位特進建昌王攸寧爲冬官尚書楊執柔地官尚書並罷政  
事以崔元綜李昭德並爲鸞臺鳳閣侍郎姚璿李元崇文昌左  
右丞王璿夏官尚書崔神基司寶卿並同鳳閣鸞臺平章事璿  
始創議請撰時政記月送史館秋九月庚子后以春秋高善自  
塗澤俄而二齒復生大赦復改今元用九月爲社以并州爲北  
都賜酺七日癸丑流李游道袁智弘王璿崔神基李元素於嶺  
南冬十月丙戌武威道行軍總管王孝傑敗吐蕃克四鎮  
二年冬正月親幸神宮自制大樂舞用樂工九百人以承嗣亞

獻三思終獻后惡公卿私謁皇嗣殺尚方監裴匪躬內常侍范  
雲仙大將軍阿史那元慶果毅薛大信尚書蘇幹相州刺史來  
同敏驥月癸亥殺皇嗣妃劉氏竇氏丁卯降封皇孫成器等皆  
爲郡王春一月庚子夏官侍郎婁師德同平章事夏五月或告  
皇嗣謀反命來俊臣鞠之樂工安金藏力辨得免又告流人謀  
反命六道使萬國俊等往殺之癸丑河湓棣州秋九月丁亥朔  
日食乙未加號金輪聖神皇帝大赦賜酺七日作金輪白象等  
七寶庚子又追烈祖尊號曰渾元顯祖尊號曰立極太祖尊號  
曰無上辛丑姚璹罷以韋巨源陸元方同平章事豆盧欽望守  
內史

延載元年臘月甲戌突厥默啜寇靈州右鷹揚衛大將軍李多  
祚敗之春一月甲午婁師德爲河源積石懷遠等軍營田大使

二月庚午薛懷義爲伐逆道行軍大總管領十八將軍以擊默  
啜乙亥旱慮囚已卯王孝傑及吐蕃戰於冷泉敗之三月甲申  
蘇味道爲鳳閣侍郎同平章事李昭德檢校內史夏四月壬戌  
常州地震五月甲午加號越古金輪聖神皇帝大赦改元賜酺  
七日秋七月癸未嵩嶽山人武什方爲正諫大夫同平章事八  
月罷之戊辰王孝傑同三品已巳姚璿守納言楊再思杜景佺  
爲鸞臺鳳閣侍郎同平章事戊寅流崔元綜于振州九月壬午  
朔日食壬寅貶李昭德爲南賓尉冬十月壬申李元素周允元  
爲鸞臺鳳閣侍郎同平章事嶺南獠寇邊容州都督張元遇爲  
桂永等州經略大使

天間萬歲元年冬正月辛巳加號慈氏越古金輪聖神皇帝改  
元證聖大赦賜酺三日戊子貶豆盧欽望趙州韋巨源鄆州杜

景佺潯州蘇味道集州陸元方綏州皆爲刺史臘月丙辰神官  
火春一月丙午王孝傑爲朔方道行軍總管以擊突厥二月巳  
酉朔日食壬子懷義伏誅甲子罷慈氏越古號四月戊寅武三  
思率蕃獫及耆老數萬人請紀太后功德命大裒銅鐵冶爲  
八面柱面濶五尺高一百五尺趾象山形周百七十尺負以銅  
龍四圍石獸環之柱顛爲雲蓋作四蛟以承大珠高丈圍三之  
置端門外號大周萬國頌德天樞悉鏤羣臣會長名氏其上九  
月甲寅南郊加號天冊金輪大聖皇帝大赦復改今元賜酺九  
日改崇先廟爲崇尊廟

萬歲通天元年臘月甲戌如永昌縣甲申封祀神嶽加號天中  
皇帝天靈妃爲天中皇后大赦改元萬歲登封賜酺十日赦日  
置雞壇南大榭樹杪號金雞樹丁亥禪於少室免今歲租洛州

加賜二年登封告成二縣三年癸巳還神都自作述志刻石示  
後春一月甲寅裴思德爲肅邊道行軍副總管以擊吐蕃巳巳  
改崇尊廟爲太廟三月壬寅孝傑師德敗績於素羅汗山丁巳  
復作明堂后親饗改名通天宮大赦復改今元賜酺七日四月  
癸酉夏官侍郎孫元亨同平章事庚子貶師德原州司馬五月  
壬子松漠都督李盡忠及歸誠州刺史孫萬榮陷營州殺都督  
趙文龍改其名盡滅萬斬乙丑命武三思等二十八將擊之八  
月丁酉戰於黃巖谷敗績將軍張玄遇少卿麻仁節被執九月  
庚子復命武攸宜爲清邊道行軍大總管以往丁巳吐蕃寇涼  
州都督許欽明死之及請和親遣武衛參軍郭元振往察其宜  
庚申并州長史王方慶爲鸞臺侍郎與殿中監李道廣並同平  
章事十月辛卯李盡誠死萬斬代領其衆寇冀州刺史陸寶積

死之甲午慮囚

神功元年冬正月壬戌來俊臣復用與吉項武懿宗誣殺李元  
素孫元亨參軍裴連耀刺史劉思禮王勔侍郎石抱忠劉奇給  
事周誦舍人王勣來庭御史王助司議郎路敬淳員外郎劉慎  
之字文全志主簿柳瑒凡三十六家流其家屬千人癸亥默啜  
寇勝州平狄軍副使安道買敗之甲子復起師德守鳳閣侍郎  
同平章事春二月乙巳慮囚三月庚子王孝傑及孫萬斬賊於  
東硤石谷敗績死之戊申赦河南北夏四月戊辰鑄九鼎各依  
九州方位置於通天宮癸酉王及善爲內史癸未武懿宗爲行  
軍大總管婁師德副之沙吒忠義爲前軍總管率兵二十萬以  
討孫萬斬六月丁卯李昭德來俊臣有罪伏誅己卯宗楚客同  
平章事戊子武承嗣三思同三品辛卯萬斬爲家奴所殺餘黨

悉平命婁師德安撫河北秋九月壬寅奏捷大赦改元賜酺七日冬十月甲子給復徇忠立節二縣閏月甲寅狄仁傑爲鸞臺侍郎同平章事

聖曆元年冬正月甲子享通天宮大赦改元賜酺九日后悟王諸武非天下意恐萬歲後復爲諸宗躡藉乃引諸武及皇嗣公主誓告天地復置鐵券使藏史館改吳陵署爲攀龍臺皇嗣因固請遜位許之三月己巳名廬陵王戊子至自房州四月辛丑婁師德爲隴右諸軍大使檢校河西營田事五月默啜請以女爲帝妃命淮陽王武延秀納之遣閭知微往使默啜怒非帝子寇邊降知微后遣武重規爲天兵中道大總管沙吒忠義爲西道前軍總管李多祚閭敬容後軍總管張仁亶爲東道總管富福信爲奇軍總管以擊之癸丑寇蔚州乙卯寇定州刺史孫彥

高死之九月戊辰又寇趙州長史唐波若降刺史高敏死之復  
寇相州王巾立廬陵王爲皇太子復名顯賜姓武氏大赦賜酺  
五日甲戌命爲河北道行軍元帥狄仁傑副之以討默啜是歲  
武三思檢校內史武攸宜同三品兼徐方慶爲司屬卿蘇味道  
姚元崇李嶠同平章事族閭如徵 二年冬正月壬戌封皇嗣  
旦爲相王改控鶴監爲奉宸府以張易之爲奉宸令張昌宗爲  
奉宸大夫臘月戊子吉頊爲天官侍郎魏元忠鳳閣侍郎同平  
章事春二月太后不豫遣給事中閻朝隱麟少室山三月婁師  
德爲納言夏四月壬辰魏元忠爲天兵軍大總管以備突厥甲  
辰慮囚秋八月庚子王及善爲文昌左相陸元方鸞臺侍郎同  
平章事豆盧欽望爲文昌右相同三品戊申武三思爲內史九  
月乙亥如福昌縣曲赦冬十月丁亥吐蕃首領贊婆來是歲大



雨水洛與黃河皆溢

久視元年冬正月戊午貶吉項於嶺南臘月辛巳封皇太子男  
重潤爲郤王庚寅阿史那斛瑟羅爲平西軍大總管丁酉狄仁  
傑爲內史庚子韋巨源爲納言乙巳如嵩山春一月丁卯如溫  
湯戊寅作三陽宮三月癸丑夏官尚書唐奉一爲天兵中軍大  
總管以備突厥夏四月戊申如三陽宮五月巳酉朔日食癸丑  
后疾康復赦天下改元罷天冊金輪大聖號賜酺五日閏七月  
巳丑天官侍郎張錫改鳳閣侍郎同平章事丁酉吐蕃寇涼州  
隴右大使唐休璟敗之於洪源谷壬寅禁隋楊素子孫兄弟並  
不許任京官侍衛八月庚申欽天下僧錢作大像冬十月甲寅  
復唐正朔丁巳韋安石爲鸞臺侍郎同平章事丁卯如新安隴  
蜀山曲赦十二月甲寅突厥寇隴右以魏元忠爲蕭關道行軍

大總管以備之

長安元年春正月丁丑赦改元大足二月己酉鸞臺侍郎李懷遠同平章事三月雨雪獻三足牛丙申流張錫於循州夏四月癸丑姚元崇檢校并州以北諸軍州兵馬五月乙亥如三陽宮天官侍郎顧琮夏官侍郎李迥秀並同平章事乙亥楊楚常潤蘇五州地震壬午蘇味道按察關平等州兵馬秋九月壬申張易之構殺邵王重潤及永泰郡王并壻武延基冬十月壬寅還京辛酉大赦復改今元賜酺三日丙寅魏元忠同三品十一月壬申武三思罷戊寅改含元宮爲大明宮十二月崔玄暉爲天官侍郎郭元振涼州都督二年春正月始設武舉三月丙戌李迥秀安置山東軍馬檢校武騎兵庚寅突厥寇鹽夏并代忻州命雍州長史薛季昶山東防禦大使張仁愿備禦之秋八月

賜張昌宗爵鄴國公辛亥劔南六州地震九月乙丑朔日食不  
盡如鉤己卯吐蕃請和冬十月日本遣使入貢戊申吐蕃寇悉  
州茂州都督陳大慈敗之甲寅姚元崇同平章事十一月戊子  
郊大赦賜酺十二月甲午魏元忠爲安東道安撫使三年春  
三月壬午朔日食夏四月庚子吐蕃來求婚乙巳旱避正殿閏  
月改文昌臺爲中臺己卯李嶠知納言事六月寧州大水秋七  
月壬寅朱敬則同平章事庚戌唐休璟爲夏官尚書同平章事  
八月乙酉京師大雨雹九月庚寅朔日食既丁酉貶魏元忠爲  
高要尉流張說嶺南冬十月丙寅如神都十二月丙戌遣使以  
六條察天下州縣置關三十四年春正月丁未作興泰宮壬  
子韋嗣立爲鳳閣侍郎同三品二月癸亥貶李迥秀廬州刺史  
三月宰相請以嗣立等二十人爲諸州刺史丁亥進封皇孫重

福譙王己亥貶蘇味道坊州刺史夏四月壬戌常安石知納言  
李嶠知內史事丙子如興泰宮五月丁亥大風拔木六月辛酉  
姚元之爲相王府長史乙丑崔元暉爲鸞臺侍郎同平章事壬  
午元之兼夏官尚書同三品秋七月丙戌楊再思守內史甲午  
貶宗楚客原州都督八月庚申唐休璟兼幽營二州都督安東  
都護九月壬子姚元之爲靈武道行軍大總管兼安撫大使甲  
戌判秋官侍郎張柬之懷州長史房融行鳳閣侍郎常承慶並  
同鳳閣鸞臺平章事自是月至十二月陰晦大雨雪都人多凍  
死者

神龍元年春正月壬午太后不豫居迎仙宮詔文明以後罪人  
除楊豫博三州及諸逆魁首外咸赦除之癸卯張柬之崔元暉  
及中臺左丞敬暉司刑少卿桓彥範相王司馬袁恕已謀誅亂

賊與左羽林大將軍李多祚將軍李湛薛思行趙承恩右羽林將軍楊元琰職方郎中崔泰之庫部員外朱敬則司刑評事冀仲甫司農少卿翟世言內直郎王同皎合謀因姚元之密謁太子于北門許之乃率二衛兵五百餘人由玄武門斬關而入誅易之昌宗及汴州刺史張昌期司禮少卿張同休通事舍人張景雄彥範等請傳位以順天人之望甲辰制皇太子監國丙午復皇帝位戊申上尊號曰則天大聖皇帝徙居上陽宮大赦改元賜文武官階諸爲酷吏所枉陷者咸令雪免惟易之黨不在原限大酺五日免今歲租賦給復房州三年放宮女三千人加封旦安國相王特進太尉同三品加太平公主號鎮國俱賜實封萬戶庚戌轉東之夏官尚書封漢陽郡公恕已南陽郡公仍同三品玄瞻守內史博陵郡公暉平陽郡公彥範譙郡公皆爲

納言多祚遼陽郡王同皎瑛邪郡公賜實封俱各有差二月甲寅復國號唐宗廟社稷陵寢郊祀服色官名並依永淳已前故事貶常承慶高要尉流房融于高州出姚元之爲亳州刺史甲子復皇后常氏見於太廟大赦賜酺封后父元貞上洛郡王母崔氏上洛王妃宗室韓王元嘉以下非命死者追復官爵備禮改葬復皇親被配沒者屬籍子孫照舊嗣承襲求直言舉賢良方正科丙寅武三思爲司空同三品攸暨司徒貶譙王重福濮州刺史辛未朝上陽宮甲戌改封皇子重俊衛王重茂溫王三月甲申追復李衡官爵起墳改葬昭洗被禍子孫各還蔭叙追奪諸酷吏官爵禁錮子孫罷奉宸府官員置左右千牛衛大將軍以相王爲之每大朝會入內供奉已丑恕已東之爲中書令夏四月彥範敬暉爲侍中魏元忠爲衛尉卿崔玄暉祝欽明刑

部常安石吏部楊再思戶部皆尚書李懷遠左散騎常侍唐休  
璟輔國大將軍並同中書門下三品五月壬午罷武氏七廟遷  
神主於崇恩廟乙酉立太廟社稷於東都戊子復周隋二王後  
壬辰進封皇兄千里成王甲午封張柬之等皆爲郡王金加特  
進罷政事以常安石爲中書令魏元忠爲侍中唐休璟豆盧欽  
望左右僕射癸卯遞降武氏封王者爲郡王郡王爲國公皇后  
表請改易制度士庶喪出母服三年百姓二十三爲丁五十九  
免役詔從之六月壬子左驍衛大將軍裴思諒爲靈武道行軍  
大總管以備突厥是夏河北十七州大水漂沒人居洛水溢給  
復遣賑秋七月柬之辭疾以爲襄州刺史八月壬戌追冊妃趙  
氏爲皇后乙亥祔孝敬皇帝於東都太廟丁丑幸洛城南門觀  
鬪象九月壬午祀明堂大赦賜酺冬十月癸亥幸龍門香山寺

乙丑獵於新安辛未魏元忠爲中書令楊再思爲侍中十一月  
戊寅羣臣上尊號曰應天皇帝皇后曰順天皇后壬午及皇后  
享於太廟大赦己丑幸洛城南門觀潑寒胡戲十二月壬寅皇  
太后崩臨朝二十一年壽八十一遺制去帝號諡曰則天大聖  
皇后二年春正月戊戌李嶠同三品于惟謙同平章事閏月  
丙午太平安樂二公主有寵各開府置官屬二月乙未韋巨源  
爲刑部尚書同三品丙申遣十道使巡察天下風俗武三思惡  
敬暉等出爲諸州刺史三月置員外官自京師及諸州凡二千  
餘人宦官超遷者又千人夏四月加贈后父鄧王叔四人皆爲  
郡王己亥鄧縣雨毛辛丑洛水溢殺處士帝月將五月庚申祔  
葬皇太后六月戊寅三思誣告駙馬王同皎與五王謀廢皇后  
遂殺同皎貶五王遠州司馬秋七月戊申立衛王重俊爲皇太



于三思復陰榜皇后穢行於天津橋指爲敬暉等所爲上大怒  
命李承嘉窮蹙悉流遠州尋殺之冬十月癸巳蘇瓌爲侍中十  
一月戊午流妖妄術士鄭普思於儋州十二月己卯沙吒忠義  
及突厥戰於鳴沙敗績丙戌京師旱河北水減膳罷土木工遣  
使存撫令內外各進破滅突厥策并募武藝超絕者

景龍元年春正月庚子朔以災異不受朝丙辰遣三思等詣乾  
陵禱雨隨降上大喜二月丙戌復武氏陵廟仍置令丞守戶名  
鄧王廟曰褒德陵曰榮先三月吐蕃遣使入貢夏四月庚寅幸  
薦福寺曲赦雍州五月戊戌張仁亶爲朔方道行軍大總管以  
備突厥丙午默啜殺行人臧思言六月丁卯朔日食戊子吐蕃  
及姚州蠻寇過姚州道討擊使唐九徵敗之秋七月辛丑皇太  
子以羽林千騎兵誅武三思崇訓兵潰死之癸卯大赦皇后獻

神武頒改玄武門樓爲制勝樓千騎爲萬騎壬戌李嶠爲中書  
令八月丙戌加上尊號曰應天神龍皇帝后曰順天翊聖皇后  
九月丁酉蕭至忠宗楚客紀處訥並同中書門下三品庚子大  
赦改元賜文武階勲辛亥楊再思爲中書令帝巨源紀處訥爲  
侍中冬十月戊寅殺蘇安恒壬午慧出西方月餘而滅十二月  
乙丑朔日食山東河南饑疫遣使賑恤二年春二月癸未夜  
天保星隕西南有聲如雷庚寅慶雲見皇后衣上大赦天下進  
五品以上母妻封號二等無妻者聽授女民婦八十以上版授  
郡縣鄉君三月丙子朔張仁亶築三受降城夏四月癸未增修  
文館大學士八員直學士十二員六月丁亥改太史局爲監罷  
隸秘書省秋七月辛卯台州地震癸巳張仁亶同三品丁酉李  
星出胃昂間有赤氣竟天光燭於地三日乃滅冬十一月庚申

西突厥娑葛自立爲可汗殺行人馮嘉賓遣弟遮督犯塞命安  
西都護牛師獎討之巳卯安樂公主出降武延秀大赦賜酺癸  
未師獎及西突厥戰於火燒城死之是冬行墨勅斜封賣官

三年春正月自去秋九月始黃霧昏濁日赤無光二月巳丑及  
皇后幸玄武門觀宮女拔河爲戲又命爲宮市觀其互爭貿易  
三月以韋巨源楊再思爲左右僕射宗楚客爲中書令蕭至忠  
爲侍中韋嗣立兵部尚書韋溫太子少保皆同三品崔湜兵部  
侍郎趙彥昭中書侍郎鄭愔吏部侍郎俱同平章事夏五月丙  
戌以賊貶崔湜襄州刺史鄭愔江州司馬六月癸巳太白晝見  
庚子旱避殿減膳撤樂慮囚壬寅遣使天下收括圖史經籍秋  
七月丙辰娑葛降辛酉幸黎園亭宴侍臣學士詔從皇后表請  
婦人非緣夫子加封邑者許蔭子孫庚辰澧水溢八月乙酉李

嶠位特進韋安石爲侍中肅至忠中書令壬辰卒出紫宮九月  
戊辰蘇瓊爲左僕射同三品十一月乙丑南郊以皇后亞獻韋  
巨源終獻大赦賜酺三日十二月壬辰致仕唐休璟爲太子少  
師同三品甲午如新豐溫湯給復賜從官勳四年春正月丙  
寅及皇后微行觀燈因幸肅至忠第丁卯夜幸韋安石及長寧  
公主第巳卯幸始平送金城公主歸吐蕃二月壬午曲赦咸陽  
改始平爲金城縣庚戌令宰相文武并諸學士咸自芳林門入  
集於梨園分朋拔河帝與皇后公主往觀之三月甲寅幸臨渭  
亭修禊丙辰遊宴桃花園庚申京師雨水井水溢夏四月丁亥  
遊櫻桃園引羣臣馬上口摘置酒爲樂乙未汎隆慶池因幸尚  
書竇希宅五月辛酉改封號王邕汴王同三品丁卯許州叅軍  
燕欽融上書言皇后淫亂預政安樂公主及延秀楚客等同危

宗社帝召見面詰意殊不平其黨散騎常侍馬秦客光祿少卿楊均皆幸於后大懼事泄公主入欲皇后臨朝求爲皇太女相與合謀進鵠六月壬午帝崩於神龍殿在位七年壽五十秘不發喪皇后親總庶政徵諸府兵屯京城列爲左右營命諸韋子姪分統之癸未以刑部尚書裴談工部尚書張錫同三品吏部尚書張嘉福中書侍郎岑義吏部侍郎崔湜同平章事命大將軍趙承恩薛簡帥兵五百往均州備譙王重福太平公主與上官昭容草遺制立溫王重茂爲皇太子皇后爲皇太后知政事甲申發喪於太極殿大赦改元唐隆以相王旦爲太子太師參謀政事進封雍王守禮邠王成器宋王宗正卿晉封新興王丁亥皇太子卽位柩前時年十六皇太后臨朝稱制立妃陸氏爲皇后韋溫總知內外兵馬壬辰遣使諸道巡撫紀處訥開內道

張嘉福河北道岑義河南道庚子夜臨淄王隆基舉兵靖亂殺  
太后百官上諡曰孝和皇帝廟號中宗

冊曰於碩陽九剝極履坤天地易位姤復不存繼聖筆削  
王正閏文扶乾附闋千古通論

天王 唐一之五

睿宗皇帝諱旦高宗第八子中宗同母弟以龍朔二年六月已  
未生初名旭輪封殷王遙領冀州大都督歷單于大都護後牟  
名輪爲人謙恭孝友好學工草隸尤愛文字凡三徙封豫冀相  
王拜右衛大將軍遷洛州牧改今名則天初立爲皇帝革命降  
爲皇嗣徙居東宮中宗自房陵還數請讓位陞儲仍封相王任  
太子右衛率長安中加司徒右羽林衛大將軍遭時多變獨以  
恭儉退讓竟免於禍復辟後立爲皇太弟固辭不受韋后臨朝

引用其黨分握政柄忌帝望實素高潛謀危害值臨淄王舉兵  
靖難王公百寮咸上表言國家多難宜立長君矧以衆望所歸  
請卽尊位固辭不獲癸卯太白晝見甲辰受少帝禪卽皇帝位  
御承天門大赦賜立功王承暉已下千人爵秩有差復少帝溫  
王其日景雲見改景龍四年爲景雲元年乙巳鍾紹京兼戶部  
尚書劉幽求尚書左丞咸知政事加宋王成器實封二千戶益  
封成義申王進範岐王隆業薛王鎮國公主實封萬戶贈郎岌  
燕欽融蘇安恒諫議大夫韋月將宣州刺史薛稷崔日用皆黃  
門侍郎叅知機務秋七月丙辰復天后號廢陵廟州縣名改武  
字者亦復其故追諡雍王賢章懷太子重俊節愍太子復敬暉  
等五王及成王千里李多祚等官爵削三思崇訓等爵諡仍戮  
其尸廢韋后安樂公主爲悖逆庶人唐休璟致仕停張仁亶知

機務已已開平王爲皇太子拜成器太子太師姚元之宋璟左  
右庶子俄以璟爲吏部尚書元之兵部尚書文武皆得人又加  
長安令李朝隱大中大夫以不畏強禦賜中上考八月庚寅譙  
王重福潛入東都構逆洛州長史崔日知討平之癸巳罷斜封  
官復太史局左右春坊左右羽林官名河南洛陽華州舊名以  
萬騎補外官更置飛騎及兩州節度使以薛訥爲之起唐休璟  
朔方道行軍大總管以備突厥姚州蠻反越嶲路絕九月庚戌  
封皇孫嗣貞許昌嗣謙真定皆郡王冬十月甲申出孝敬皇帝  
神主別立義宗廟以奉之丁未姚元之爲中書令十一月辛亥  
成器爲左僕射蘇瓌右僕射韋安石太子少保並罷政事是歲  
出崔日用祝欽明郭山樞爲諸州長史薛稷右散騎常侍貶汴  
王邕蕭至忠韋嗣立趙彥昭崔湜裴談張錫岑羲李嶠皆爲州



刺史惟張嘉福伏誅

景雲二年春正月丁未朔不受朝賀癸丑改泉州爲閩州都督以榮州爲泉州分瀛州置鄭州遣中丞和逢堯使突厥許默啜和親己未郭元振張說同平章事甲子改封重茂襄王遷於集州乙丑追諡故后劉氏爲肅明皇后墓曰惠陵妃竇氏爲昭成皇后墓曰靖陵二月丁丑令皇太子監國出宋幽二王爲同幽二州刺史安置太平公主蒲州旣而太子懼奏乞寢二王命復還公主從之仍以姚元之宋璟離間左授申與楚州刺史丙戌劉幽求罷韋安石爲中書令李日知爲侍中戊子復斜封官太平公主請復武氏吳驥二陵量置官屬改西域隆昌爲金仙玉貞公主仍置金仙玉貞兩觀命竇懷貞董役加左臺御史大夫同平章事綱紀紊亂復如景龍之世庚申置太子左右諭德贊

善各兩員改修文館爲昭文館夏四月制凡政事皆取皇太子處分壬寅大赦放雪重福徒黨大酺五日閏六月始置十道按察使秋八月乙卯以興聖寺高祖舊宅柿樹枯死重生赦免謀殺劫殺造僞頭首死罪及受賄官吏配流嶺南者仍酺三日庚午改屯衛爲左右威衛宗衛率府爲左右司禦府渾儀監爲太史監九月丁卯竇懷貞加侍中冬十月甲辰魏知古崔湜同三品陸象先同平章事上以水旱爲災御承天門引安石元振懷貞曰知并說責以政事多闕罷之十一月召天台道士司馬承禎至京尋許還山

太極元年春正月辛未朔謁太廟癸酉始釋慘服御正殿受朝賀甲戌并汾絳三州地震辛巳南郊戊子耕籍巳丑大赦改元大酺五日增孔廟灑掃三十戶賜九十巳上緋衣象笏八十巳

上綠衫木笏乙未岑義寶懷貞並同三品二月丁亥皇太子釋奠國學列四科從祀於七十二賢之上巳巳頒新格式於天下夏五月戊寅祀北郊大赦改元延和還五王子孫寶封二百戶大酺五日六月癸丑岑義爲侍中庚申幽州都督孫佺率將軍左驍衛李楷洛左威衛周以悌等與奚首領李大酺戰於礪山敗績佺沒於陣辛酉命郭元振李迥秀爲朔方道前後軍大總管以代之壬戌魏知古兼戶部尚書秋七月辛未彗星入太微垣乙亥寶懷貞進右僕射平章軍國重事巳卯上於安福門觀樂以燭繼晝八月庚子詔傳位皇太子尊帝爲太上皇五日一朝於太極殿五品已上除授及大刑獄仍自決之自稱曰朕處分事稱詔令皇帝曰受朝於武德殿五品以下除授及輕罪並令決之自稱曰子處分事稱制勅甲辰大赦改是年爲先天元

年八月戊申改封皇子嗣直鄒王嗣謀郢王嗣昇陝王已酉加  
成器司空庚戌竇懷貞劉幽求爲左右僕射同三品魏知古爲  
侍中崔湜中書令並監修國史丁巳立妃王氏爲皇后癸亥流  
劉幽求封州九月丁卯朔日食冬十月庚子謁太廟壬寅祔昭  
成肅明二后神主於儀坤廟癸卯幸新豐校獵於渭川

先天二年春正月乙亥肅至忠爲中書令上元夜上皇御安福  
門觀燈一夜方罷二月丙申改冀州爲儀州隆州爲閬州始州  
爲劍州分冀州置深州三月辛卯皇后祀先蠶夏六月丙辰加  
郭元振同三品秋七月甲子太平公主謀逆事覺皇帝率兵誅  
其黨與翌日太上詔歸政皇帝

間曰有唐兩葉聖嗣獻興智哉寧王孫爾吉成武德幾覆  
先天秦享萬世之下遠求厥寧

弘簡錄卷之四

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之六

玄宗皇帝諱隆基睿宗第三子母竇皇后以垂拱元年八月戊寅生於東都性英斷多藝洞知音律善八分書儀範偉麗有非常之表三年封楚王天授三年十月戊戌出關開府置官屬朔望入朝時天后臨御金吾將軍武懿宗倚勢訶排儀從因欲折之時方七歲叱曰吾家朝堂干汝何事敢迫吾車騎天后聞之轉加寵愛長祿二年降封臨淄郡王聖曆元年賜第東都積善坊長安中從幸西京更賜第興慶坊屬王室多故陽引材力之士以自助歷右衛郎將尚輦奉御神龍初遷衛尉少卿宅外有

水池頃常泛溢望氣者以爲龍中宗特幸其第因遊于池結綵  
爲樓船令巨象踏之景龍二年兼潞州別駕加銀青光祿大夫  
州境有黃龍白日升天又嘗出畋從者望見有紫雲在其上前  
後符瑞凡一十九事四年郊祀來朝使術士韓禮指筮忽一莖  
孑然獨立禮驚以爲奇瑞非常不可以言果中宗暴崩羣后稱  
制改元唐隆與所居里隆慶相符益自負荷密以誅亂謀告于  
太平公主公主喜卽令子薛崇簡從復陰與朝邑尉劉幽求長  
上果毅麻嗣宗萬騎果毅葛福順李仙臯道士馮道力處士劉  
承祖寶昌寺僧普潤等定策或請先啓父王止之曰我極社稷  
之危赴君父之急事成福歸宗社不成身死忠孝安可先請憂  
怖父王乎萬一不從吾計失矣密於庚子夜率幽求等數十人  
自苑南入苑總監鍾紹京率丁匠以從分往玄武門殺羽林將

軍韋播高嵩持其首至衆歡呼大集攻白獸玄德等門斬關而  
進與左右萬騎合於凌煙閣前大譟宿衛梓宮萬騎聞之皆披  
甲來應韋后惶惑而走爲亂兵所害於是分誅韋氏黨與韋溫  
紀處訥宗楚客宗晉卿武延秀馬秦客葉靜能趙履溫楊均等  
梟首安福門外黎明內外皆定此謁父王先謝不啓請之罪王  
遽前抱泣曰宗社禍難由汝安定神祇萬姓皆賴汝力辛丑挾  
少帝御安福門樓撫慰百姓卽拜殿中監龍武右軍將軍兼押  
左右萬騎知內外閑廐同中書門下三品進封平王睿宗卽位  
議建儲嗣大臣僉議除天下之禍者當享天下之福拯天下之  
危者當受天下之安平王有聖德成器已下咸加推讓宜膺主  
宅以副羣心乃命有司擇日備禮丙午睿宗御承天門令詣朝  
堂冊爲皇太子先天元年六月術人據玄象帝座及前星有災

皇太子合作天子不合更居東宮睿宗曰傳德避災吾意決矣  
七月壬午制有司擇日禪代聞而惶懼馳見叩頭請所以傳位  
之意睿宗曰吾藉汝功業宗社復安今帝座有青思欲遜避唯  
聖德大勲始轉禍爲福吾知易位於汝已爲晚矣明年太平公  
主謀以七月四日因羽林軍作亂上密知之卽以中旨告岐薛  
二王并郭元振王毛仲姜皎王琚崔日用允期定策取闕廐馬  
及家人三百餘率太僕少卿李令問王守一內侍高力士果毅  
李守德與親信十數人出武德殿入虔化門梟常元楷李慈於  
北闕擒賈膺福李猷於內客省執蕭至忠岑羲於朝堂皆斬之  
明日下詔睿宗徙居百福殿賜公主死自今軍國刑政並取皇  
帝處分上御承天門樓大赦天下大辟已下罪無大小咸赦除  
之加邠王寶封三百戶宋中一千戶岐薛七百戶并文武官勲



凡被諸按察及御史所摘咸與洗滌依次敘用丁卯除崔湜盧藏用名長流嶺表追賜湜死壬申賞定策功加郭元振御史大夫封王琚趙國公姜皎楚國公王守一晉國公李令問殿中監王毛仲霍國公各實封五百戶高力士右監門大將軍由此信任甲戌毀天樞己丑黜武氏七廟帝號依舊追贈王爵陵並稱墓八月壬辰召還劉幽求復官爵實封九月癸丑封華嶽爲金天王丁卯張說爲中書令己卯宴王公百寮於承天門賜物有差冬十一月癸卯講武驪山元振坐虧失軍容配流新州給事中攝太常少卿唐紹軍禮有失斬於纛下甲辰獵渭川名同州刺史姚元之爲兵部尚書同三品十一月乙丑幽求兼侍中戊子上尊號開元神武皇帝十二月庚寅朔大赦改是年爲開元元年更僕射爲左右丞和中書爲紫微省門下爲黃門省侍中

爲監雍州爲京兆府洛州爲河南府長史爲尹自國初宰相及功臣子孫未承恩者並量才擢用己亥禁撥寒胡賊癸丑劉幽求張說罷姚元之爲紫微令復名崇盧懷慎同平章事

開元二年春正月置左右教坊自教音樂自去秋不雨至于是月關中人饑遣使賑給禱名山大川求直言丙寅姚崇請汰僧尼二萬餘人甲申以薛訥同三品總兵六萬討奚契丹二月突厥默啜遣特勒同俄率衆寇北庭右驍衛將軍郭虔瓘擊敗斬之己酉旱錄囚徒已未突厥火拔頡利發石矢畢來奔授左衛大將軍封燕山郡王三月太史奏日食不應或告幽求紹京王琚怨望貶爲睦果澤三州刺史停實封四百祇存百戶黜故酷吏周利貞等十三人終身勿齒貶韋安石韋嗣立趙彥昭李嶠諸州別駕夏五月辛亥魏知古罷六月甲子上皇徙大明宮避

著上素友愛近世莫及羣臣請循故事以成器領岐州成義領

幽州守禮領虢州範領濟州業領同州皆為刺史政務委上佐

秋七月乙未焚珠玉錦繡及器玩於殿前停採造雕刻磨織錦

坊庚子薛訥與契丹戰深河敗績削爵除名丙午昭文館學士

柳沖左庶子劉子玄上刊定姓族系錄二百卷吐蕃寇臨洮及

蘭渭州掠羣牧復起薛訥攝左羽林將軍隴右防禦使卓杜賓

客郭知運王叟安思順以禦之八月戊午西天竺國遣使獻方

物九月庚寅作興慶宮丁酉宴侍臣于含元殿戊申幸溫泉此自

頻年幸之冬十月戊午訥破吐蕃於武階豐安軍使王海賓先

鋒力戰死之以郭知運為隴右節度使領洮岷蘭鄯等十二州

十二月乙丑封皇子嗣真鄧王嗣初鄂王嗣玄鄧王是瓌右威

衛中郎將周慶立為安南市舶使與波斯僧廣造奇巧將以進

內殿中侍御史柳澤上書諫止上嘉納之三年春正月丁亥立郢王嗣謙爲皇太子降德音大酺三日癸卯盧懷慎檢校黃門監夏四月突厥十姓部落及高麗莫離支高大簡都督跌思太等各率其衆來附制以河南地處之命薛訥居涼州郭虔瓘居朔州以爲備禦六月山東諸州大蝗姚崇奏差御史下諸道遣人驅撲焚瘞秋稼有穫人不甚饑秋七月庚辰朔日食冬無雪十月甲寅選耆儒博學入內侍讀以光祿卿馬懷素左散騎常侍褚無量充之十一月丁亥相州妖賊崔子崑作亂討平之四年春正月戊寅朔朝太上皇于西宮始命郢王嗣真陝王嗣昇遙領安北安西大都護二月丙辰關中旱遣使驪山祈雨有應以少牢致祭禁斷樵採夏六月庚寅月蝕既癸亥太上皇崩年五十五辛未京師華陝大風拔木癸酉突厥九姓拔曳固殺

默啜來降子將郝靈佺傳首京師復立兒子默棘連爲可汗安  
置降者振武軍北山東河南河北大蝗遣使捕瘞秋七月丙申  
置黎州己亥上太上皇謚大聖貞皇帝廟號睿宗庚午葬橋陵  
改蒲城爲奉先縣隸京兆府以奉陵寢十一月丁亥祔神主太  
廟遷中宗主于西廟甲午源乾曜爲黃門侍郎同平章事十二  
月乙卯定陵寢殿災閏月己亥崇及乾曜罷以宋璟爲吏部尚  
書兼黃門監蘇頌同平章事五年春正月壬寅朔不受朝賀  
癸卯太廟屋壞移神主于太極殿素服避殿輟朝五日己酉享  
于太極殿辛亥幸東都戊辰昏霧四塞二月甲戌還京大赦封  
故許王男淋爲嗣越王以繼貞後訪求武德貞觀以來勲臣子  
孫無位者所在奏聞有嘉遯幽棲養高不仕者各以名薦并給  
復遭澇被蝗百姓三月庚戌奚契丹首領饒樂郡王率衆內附

夏四月甲午廢拜洛受圖壇及碑文并廟秋七月甲子改明堂  
爲乾元殿受賀依正殿禮九月壬寅復兩省官名皆如故令史  
官隨宰相入侍羣臣對仗奏事冬十月丙子太廟修完戊寅祔  
還神主十一月己亥契丹首領松漠郡王李失活來朝十二月  
訪求逸書令史官月奏所行事六年春正月丙辰朔不受朝  
賀辛酉禁毀天下惡錢行二銖已上好錢二月甲戌徵嵩山隱  
士盧鴻夏六月乙酉以五王配享中宗廟庭蘇瓌劉幽求配饗  
睿宗廟庭秋八月庚辰旱慮囚九月乙未遣工部尚書劉知柔  
持節往河南道存問賜父老帛冬十一月丙申享太廟廻御承  
天門賜七廟已上支孫失官序者各與五品京官內外三品已  
上有廟者賜物三十匹以修祭服及俎豆乙巳改傳國璽稱寶  
官爲特寶郎十二月改諸王刺史憲涇州撫隆州範岐州業號

州

憲典揭以避昭成廟諱改

七年夏五月己丑朔日食秋七月丙辰久亢錄

囚諸州縣委牧宰量事處置八月癸丑收五服並從禮傳九月

甲子徙封宋王憲寧王冬十月戊寅皇太子詣國學行齒胄禮

陪位官及學生賜物有差十二月丙戌復弘文館名并崇文館

各置校書郎等官八年春正月甲子朔皇太子加元服乙丑

謁太廟己卯宋璟蘇頲罷源乾曜復爲黃門侍郎張嘉貞中書

侍郎並同平章事夏六月壬寅東都暴雨穀水漲新安澗池河

南壽安鞏等縣漂蕩廬舍民及許衛等州班軍溺死數多秋七

月突厥欲谷寇甘源等州敗涼州都督楊敬述掠契苾部落而

歸遣王晔爲兵部尚書兼幽州都督韋抗爲御史大夫朔方總

管以禦之冬十一月辛未突厥寇涼州九年春正月以宇文

融爲勸農使聽州縣逃亡戶口百日自首過期者徙邈州夏四

月甲戌策試應制舉人於含元殿秋七月己酉王叟發隴右諸軍及河東九姓破蘭池州叛寇康待賓斬之獲級三萬五千丙辰揚潤等州暴風發屋拔樹漂損公私船隻辛酉罷先天中重修三九射禮九月己巳朔日食康待賓餘黨復叛貶峻梓州刺史癸亥張說爲兵部尚書同三品冬無雪十一月丙辰元行冲上羣書目錄二百卷藏之內府庚午冬至大赦賜酺三日召還諸王刺外州者十二月乙酉命僧一行更造新曆梁令瓚造黃道遊儀 十年春正月丁巳幸東都夏四月置朔方軍以張說兼領節度使遣往巡邊五月大雨東都伊汝水漲漂溺河南許汝仙陳等州廬舍民死甚衆遣戶部尚書陸象先存撫賑給六月辛丑頒御註孝經于天下己巳增太廟爲九室移中宗神主以就正廟秋七月丙戌安南賊帥梅叔鸞等攻圜州縣遣內侍



楊思勗討之九月張說平待賓餘黨擒康願子於木盤山徙河  
曲六州殘寇五萬餘口於許汝唐鄆仙豫等州空河南朔方地  
千餘里甲戌姜皎洩言王皇后愛弛上欲廢之杖流欽州路死  
禁自今諸王公主外戚駙馬不得出入掖庭妄說言語百官不  
得與卜祝之人交游來往乙卯夜京兆人權梁山僞稱故襄王  
男率徒黨數百斬景風長樂等門入宮城搆逆至曉兵敗斬首  
傳送東都冬十月癸丑復以乾元殿爲明堂十一月乙未初令  
宰相食實封三百戶十二月停按察使是歲張說建議罷府兵  
召募壯士以充宿衛更番上下兵農之分自此始 十一年春  
正月己巳巡幸并州改名太原府建爲北都官吏補授一準京  
兆給復百姓一年貧戶二年元從功臣五年子孫未官有才堪  
文武者搜揚以聞御製起義堂頌并書刻于石庚辰次潞州改

舊宅爲飛龍宮安父老曲赦大辟以下給復五年戊辰次晉州  
壬子祠汾陰后土并理行事賜陪位官勲階有差改汾陰爲寶  
鼎縣罷張嘉貞爲幽州刺史除張說中書令王峻兵部尚書同  
三品五月峻改朔方節度兼知河北隴右河西兵馬使六月赴  
軍秋八月戊申尊八代祖宣皇帝廟號獻祖祔于九廟九月己  
巳頒所撰廣濟方令諸州各置醫博士一員其春秋釋奠依舊  
用牲屬縣乃用酒脯冬十月丁酉幸新作溫泉宮十一月戊寅  
南郊大赦賜天下酺三日京城五日十二月甲午幸鳳泉湯庚  
申貶王峻蘄州刺史是歲置麗正書院以張說爲使說奏改政  
事堂列中書門下五房於其後分掌庶政命左丞蕭嵩遷京兆  
蒲同岐華白丁一十二萬充長從宿衛十二年春三月起復  
杜暹爲安西副大都護夏四月降封神龍以後傍繼國王禮當

廢而屬近者皆爲郡王六月遷臺閣名臣以爲諸州刺史秋七月壬申月蝕旣已卯廢皇后王氏冬十月后死十一月庚申幸東都至華陰御製岳廟碑文羣臣表請封禪庚辰五溪首領單行璋反楊思勗討平之擢爲鎮國大將軍閏十二月丙辰朔日食十三年春二月宇文融知上急於川度歲終增緡錢數百萬悉進入宮上寵之擢爲御史中丞兼戶部侍郎乙亥更命長從宿衛爲驍騎分隸十二衛二月甲午改皇太子嗣謙名鴻徙封嗣直慶王名渾嗣昇忠王名浚嗣真棣王名洽嗣初則王名渭嗣玄榮王名浞又封少子滌光王濞儀王濬穎王澤永王潯王洄延王沐盛王溢濟王夏四月丁巳收集仙爲集賢殿麗正爲集賢書院置學士直學士癸酉令朝集使各舉所部孝悌文武之士集於泰山下五月庚寅妖賊劉定高夜犯通洛門擒

斬之六月乙亥廢東都西市冬十月癸丑新造銅儀成置於景  
運門內辛酉東封駕起東都十一月丙戌至兗州太宗頓丁亥  
致齋於行宮己丑日南至備法駕與宰臣禮官登山仗衛羅列  
于下百餘里行從留谷口庚寅祀昊天上帝於上壇羣臣祀五  
帝百神於下壇禮畢藏玉冊於封祀壇之石甃然後燔柴燎發  
傳呼萬歲自山頂至下震動山谷上還齋宮慶雲見日抱戴氣  
辛卯祀皇地祇於社首封藏皆如禮壬辰御帳殿受朝賀大赦  
天下盡還流人內外官賜爵級登山官增階封泰山爲齊天王  
禮秩加三公一等近山十里禁樵採輔臣乾曜左丞相兼侍中  
說右丞相兼中書令甲午駕還丙申幸孔宅設奠十二月己巳  
至東都分吏部爲十銓勅禮部蘇頌刑部韋抗工部盧從愿等  
分掌選事時累歲豐稔米斗十錢青齊斗五錢十四年春正

月命張說修五禮折衷貞觀顯慶兩書行之二月庚戌朔邕州  
獠梁大海周光等據賓橫等州叛陷四十餘城遣楊思勗討之  
夏四月張說罷政停官丁亥李元紘同平章事辛丑置軍於定  
恒莫易澹等五州以備突厥五月癸卯戶部進今歲計帳管戶  
七百六萬九千五百六十五口四千一百四十一萬九千七百  
一十二六月戊午大風發屋毀端門賜吻命中外上封指言闕  
失無有所隱秋七月癸丑夜澍水漲漂沒諸州漕船溺者甚  
衆九月己丑杜暹同平章事是歲天下水旱并霜河南北尤甚  
蘇同常福源瓌盧含遺宇文融檢覆賑給之十五年春正月  
戊寅令草澤文武高才詣闕自舉辛丑涼州都督王君奭破吐  
蕃於青海西獲輜車馬羊而還二月己巳張說致仕以朋黨免  
御史大夫崔德甫官左遷宇文融魏州刺史夏五月置十王宅

并百孫院太子不居東宮常依乘輿所幸別院其皇子各開府  
置官屬遙領藩鎮都督節度大使然不出關諸孫惟侍讀時入  
授書其餘歲時通名而已秋九月丙子吐蕃寇瓜州執刺史田  
元獻殺掠人吏取軍資倉糧而去丙戌突厥毘伽可汗使大臣  
梅錄噉來朝閏月庚子突騎施蘇祿吐蕃贊普圍安西副大都  
護趙歸貞擊走之庚申回紇部落殺王君奭于甘州以兵部尚  
書蕭嵩總兵兼判涼州以禦吐蕃是歲六十三州大水十七州  
霜旱河北大疫遣左監門將軍黎敬仁轉江淮粟數百萬往賑  
恤之十六年春正月庚子始聽政于興慶宮復用宇文融爲  
九河使請于九河故道開稻田官收其利以張說爲集賢院學  
士每朝廷有大事遣中使訪之二月改曠騎爲羽林飛騎壬寅  
趙歸貞敗吐蕃于曲子城秋七月又寇瓜州刺史張守珪擊破

之乙巳蕭嵩并部州都督張志亮攻拔吐蕃大莫門城斬獲數千級收其資畜而還八月己巳張說進開元大衍曆命有司頒行之辛卯嵩遣杜賓客復破吐蕃于祁連城獲其大將一人斬首五千級擢加平章事是歲勅長征兵分五番五年酬勲五轉歲遣一番還家洗沐制戶籍三歲一定分爲九等 十七年春

正月限明經進士每歲及第定爲百人二月丁卯嶺州都督張審素攻拔昆明及鹽城殺獲萬人庚子復張說左丞相甲寅信安王禕攻拔吐蕃石堡城夏四月禕于太廟令中書門下分就大理京兆萬年長安等獄疏決囚徒減天下死罪一等餘並原之丁亥大風震電監田山崩五月癸巳復置十道按察使六月甲戌停乾曜兼侍中罷杜暹李元紘以蕭嵩兼中書令宇文融爲黃門侍郎裴光庭中書侍郎並同平章事秋八月五日上降

誕日譙羣臣于花萼樓因請立千秋節王公以下獻鏡及承露  
冀天下諸州咸令譙樂休暇三日村閭社會並就是日編爲令  
乙酉罷源乾曜以宋璟爲右丞相九月壬子宇文融有罪貶昭  
州平樂尉道卒冬無雪十月戊午朔日食不盡如鉤癸未睦州  
竹實十一月丙申謁橋陵遥望涕泣哀動左右曲赦奉先縣大  
辟以下罪以管內萬三百戶供灑掃三府兵馬宿衛戊戌謁定  
陵巳亥謁獻陵壬寅謁昭陵乙巳謁乾陵戊申還宮大赦放還  
流人移左降官蠲百姓今年地稅之半每陵取側近六鄉供灑  
掃加內外官爵級有差 十八年春二月丙寅大雨雪俄而雷  
震左飛廐災三月命侍臣百僚每旬暇日賞勝行樂丁卯宴侍  
臣春明門外寧王園池上御花萼樓邀廻騎坐飲遞起爲舞頒  
賜有差五月契丹突可汗殺其主李召固率部落降于突厥奚



王李魯蘇亦叛制幽州長史趙含章討之六月庚申命近臣五品已上各舉才堪遷任及刺史者甲子彗出五車癸酉亭出畢昂壬午渥洛泛漲壞天津水濟二橋及堤并損仗舍民廬千餘命范安及韓朝宗就水源䟽決置門以節其勢秋八月丁亥上御花萼樓百官獻賀賜四品已上金鏡珠纁綵五品以下束帛又賦八韻及秋景詩冬十月吐蕃遣大臣名悉臘獻方物請降許之十二月戊子豐州刺史袁振坐妖言下獄死是歲天下奏死罪二十四人十九年春正月壬戌貶王毛仲襄州別駕中路賜死黜黨與十數人辛卯以詩書賜吐蕃遣鴻臚卿崔琳攝御史大夫往聘之丙子親耕于興慶宮龍池巳卯禁捕採鯉魚天下州府春秋二社及釋奠停牲牢惟用酒醢夏四月丙申兩京諸州各置太公廟以張良配享春秋二仲月上戊日致祭壬

戊令五嶽各置老君廟秋八月千秋節赦囚徒九月辛未吐蕃遣其國相論尚他碑來朝冬十二月戊戌裴光庭上提山往則維城前軌各一卷勅賜皇太子諸王二十年春正月乙卯信安王禕率兵討奚契丹三月與趙含章大破之於幽州五月戊辰獻俘上御應天門受之加王開府儀同三司六月廣花萼樓築夾城至芙蓉園秋八月辛未朔日食九月乙巳蕭嵩等上開元新禮一百五十卷頒所司行用渤海靺鞨寇登州殺刺史韋俊命左領軍將軍蓋福順發兵討之冬十月丙戌巡北都命所至舉賢才未聞達者辛卯幸飛龍宮皆復其民十一月庚午祀后土於睢州大赦盡假勲臣緋紫大酺三日十二月壬申還京戶部計戶增舊七十九萬一千六百七十一口增舊四百零一萬一千五百五十三二十一年春正月庚子朔制減貢舉人

尚書論語兩條加試老子策乙巳毀儀坤廟祔肅明皇后神主  
于太廟己未工部尚書李嵩使吐蕃三月甲寅韓休爲黃門侍  
郎同平章事閏月幽州道副總管郭英傑等討契丹收績死之  
夏四月丁巳久旱命陸象先杜暹等七人往諸道宣慰賑給黜  
陟官吏疏決囚徒丁酉加寧王太尉薛王司徒慶王太子太師  
忠王開府儀同隸王太子少傅鄂王太子太保五月甲申納皇  
太子妃薛氏降天下死罪流以下釋之賜在京文武勲一轉秋  
七月乙丑朔日食九月壬午封皇子溢濟王沔信王泚義王濯  
陳王澄豐王滌恒王漩涼王渭深王冬十一月戊子宋璟致仕  
十二月丁未蕭嵩爲右丞相韓休兵部尚書並罷政事裴耀卿  
爲黃門侍郎起復張九齡中書侍郎並同平章事是歲分天下  
爲十五道京畿都畿關內河南河東河北隴右山南東西劔南

淮南江南東西黔中嶺南各置採訪處置使擢楊慎矜爲監察御史知太府出納關中兩害稼出太倉米二百萬石給之二十二年春正月癸亥朔制古聖帝明王嶽瀆海鎮祭用牲牢餘並酒醢充奠已巳幸東都辛未遣嚴挺之裴寬裴敦復往河南懷衛邢相等州巡問賑給量貸種子二月壬寅秦州地震不止殷殷有聲壞廨宇廬舍壓死者衆命蕭嵩往祭山川遣使分賑存恤給復有差辛亥徵恒州張果授銀青光祿大夫號曰玄通先生三月歲私鑄錢禁沒京兆商人任令方資財六十餘萬夏四月乙未改伊西北庭仍爲節度使廢太廟署以太常奉宗廟庚子准勝州例立表唐州界測候晷影長短乙巳檢覆見禁因徙京師令兩省及留守天下委諸州刺史各與降罪甲寅北庭都護劉渙謀反伏誅五月戊子李林甫爲禮部尚書同平

章事是日大風拔木上以北歲令人巡檢苗稼言多不實親於苑中種麥幸皇太子以下收穫令知稼穡艱難因分賜侍臣及薦宗廟六月遣金吾將軍李佺於赤嶺與吐蕃分界立碑秋七月甲申河南開稻田許豫陳毫等州置水电遣張九齡充使又遣裴耀卿轉運江淮河南於河口置輸場八月壬寅於輸場東置河陰縣冬十二月戊子朔日食乙巳幽州長史張守珪斬契丹王屈烈及大臣可突干傳首東都餘叛奚皆散走立其酋長李過折爲王二十三年春正月乙亥親耕籍田登樓酺宴大赦令五品以上并刺史薦舉才兼王霸學究天人及堪將帥牧宰者各一人夏五月戊寅宗子請率月休於興慶宮龍池上建聖德頌秋七月丙子皇太子改名瑛慶王直已下十四王並改名又封皇子玼儀王珪陳王珙豐王珙恒王璿涼王璿汴王其

梁王琬已下並開府置官屬各食實封二千戶八月戊子免鰥寡孤獨今年地稅之半江淮以南遭水處本道使賑給之九月戊申移泗州就臨淮縣置冬十月辛亥移伊西北庭都護屬四鎮節度突騎施寇北庭及安西撥換城十一月壬申朔日食十二月冊壽王妃楊氏二十四年春正月北庭都護蓋嘉運率兵破突騎施三月乙未始移考功貢舉命禮部侍郎掌領夏四月張守珪遣討擊使安祿山伐奚契丹收績執送京師上惜其才赦之六月丙午醴泉妖人劉志誠率衆爲亂盡擒斬之是夏大熱道有暍死者秋七月庚子置壽星壇祭老人星及角亢七宿八月戊申朔增宗廟籩豆各十二加親舅小功舅母總麻堂舅袒免服制張九齡進千秋金鑑錄五卷賜書褒美九月壬午改尚書主爵曰司封冬十月戊申京師地震十一月壬寅肅嵩

韓休裴耀卿張九齡並罷以李林甫兼中書令牛仙客兵部尚書同三品知門下省事二十五年春正月置玄學博士每歲依明經舉癸卯拜道士尹愔諫議大夫集賢殿學士兼知史館二月始勅明經對時務策三道進士試經義十帙戊午行和羅法停江淮運癸酉張守珪破契丹餘衆於捺祿山殺獲甚衆三月乙卯河北節度使崔希逸襲破吐蕃於青海西夏四月辛酉監察御史周子諒上書忤旨暴於朝堂決杖死之追謫薦者張九齡荊州長史乙丑以譖廢皇太子瑛鄂王瑤光王琚並爲庶人尋賜死長流妃兄駙馬薛鏞於濃州至藍田驛賜死六月壬戌熒惑犯房至心星越度而過秋七月己卯大理少卿徐岷奏今歲斷死刑五十八幾致刑措有烏巢寺之獄上特推功元輔封林甫晉國公仙客幽國公九月壬申頒新定令式及事類一

百三十卷於天下冬十月定制立春日迎春於東郊諸月朔於正殿讀時令十二月丙午惠妃武氏薨自是後宮無當意者是歲吐蕃使其大臣屬盧論莽藏來朝貢二十六年春正月乙亥加牛仙客侍中王璵爲祠祭使丁丑迎春東郊祀青帝降天下死罪流餘並放免還京兆新開稻田散給貧民賜百官勲絹長安萬年河南洛陽四縣各與本錢千貫收利充人吏課役天下州縣每鄉置學擇師教授諸鄉貢令就國子監謁先師明經加口試內外八品已下及草澤士有博學文辭者各委司州開薦二月辛酉廢仙州分其屬縣隸許汝等州三月丙子李出紫微垣歷斗魁癸未京兆地震吐蕃寇河西崔希逸擊破之鄯州都督杜希望攻拔新羅城置威戎軍夏四月己亥朔太常卿韋縉讀時令于宣政殿百寮列坐而聽六月庚子立忠王璵爲皇



太子大赦加王府官階賜酺三日秋七月庚辰分置明州九月  
丙申朔日食庚子始置宥州於舊六胡之地益州長史王昱率  
兵攻吐蕃安戎城大敗貶高要尉而死冬十月戊寅兩京各建  
行宮造殿宇千餘間析左右羽林置左右龍武軍以舊騎營隸  
焉 二十七年春正月壬寅榮王琬巡按隴右二月己巳加上  
尊號開元聖文神武皇帝大赦賜酺五日以後宗廟薦饗並用  
宗子夏四月丁酉牛仙客兼侍中李林甫爲吏部尚書兼中書  
令秋七月辛丑癸亥犯南斗八月甲申加封孔子爲文宣王南  
向被王者服四配十哲皆封侯餘並封伯改褒聖侯爲文宣公  
九月太常奏舊制三年一禘五年一禘今歲夏旣禘冬又當禘  
祭數則煩請通計五年一禘一禘從之冬十月毀東都明堂上  
層改拆下層復爲乾元殿十二月以益州司馬章仇兼瓊權劔

南節度益州大都督府長史是歲蓋嘉運大破突騎施之衆殺  
蘇祿擒其王吐火仙送于京師二十八年春正月壬寅上元  
節御勤政樓讌羣臣連夜燒燈會大雪而罷續於二月望夜補  
之三月下亥朔日食壬子章仇兼瓊拔吐蕃安戎城分兵鎮守  
之夏五月乙未以阿史那昕爲十姓可汗六月蓋嘉運節度河  
西隴右兵馬已而無功九月庚寅封皇孫倖等十九人皆爲郡  
王冬十月甲子幸溫泉宮度壽王妃楊氏爲道士號太真乙酉  
吐蕃寇安戎城十二月乙卯突騎施酋長莫賀達干率衆內屬  
時頗歲豐稔京師米斛不滿二百天下乂安雖行萬里不持寸  
兵二十九年春正月丁酉命兩京諸州各立玄元皇帝廟并  
置崇玄學博士助教生徒專習老莊列文中子每年准明經例  
考試許內外官保薦伯叔兄弟子姪堪任刺史縣令者禁九品

已下清資官置客舍邸店車坊并士庶奪葬三月吐蕃突厥各遣使來朝秋七月乙卯洛水漲毀天津橋及上陽宮仗舍民廬溺死者衆突厥登利可汗死以北州刺史王斛斯爲幽州節度使安祿山爲營州刺史平盧軍副節度押兩蕃渤海黑水四府經略等使九月大雨雪稻禾似折命御史中丞張倚賑恤東都河北博洛等二十四州壬申御興慶門試玄學生姚子彥元載等四人冬十月戊戌分遣大理卿崔翹等八人往諸道黜陟官吏十二月丁酉吐蕃入寇陷廓州達化縣及振武軍石堡城蓋嘉運不能守女國王趙曳夫及佛逝國日南國各遣使朝獻天寶元年春正月丁未朔陳王府參軍田同秀言玄元皇帝降于丹鳳門通衢告賜靈符上遣使就故兩谷關尹喜臺西發得之命建玄元廟於大寧坊擢同秀朝散大夫加尊號爲開元天

寶聖文神武皇帝大赦改元免百姓所欠諸色租稅令所在薦  
舉儒學博通文辭英秀軍謀武藝及京官堪任刺史者封狀自  
舉二月辛卯享立元皇帝于新廟加號莊子南華真人文中子  
通玄真人列子冲虛真人庚子洞虛真人所著書名為真經  
甲午享太廟丙申合祭南郊例推恩改桃林縣爲靈寶縣侍中  
爲左相左右丞相依舊爲僕射黃門侍郎爲門下侍郎東北二  
都皆爲京天下諸州爲郡刺史爲太守凡縣重名者悉改之庚  
子進安祿山驃騎大將軍秋七月癸卯朔日食八月丁丑李適  
之爲左相丁亥突厥阿布思及默啜孫登利可汗之女相率其  
黨來降壬辰改林甫耀卿左右僕射適之兼兵部尚書九月辛  
卯上御花萼樓出宮女譙毘伽可汗妻可敦及男女等賞賜不  
可勝紀丙寅尊立元廟爲太上立元皇帝宮冬十月辛丑號號

山爲會昌山分新豐置會昌縣立祠泰坑儒之所以祀遭難諸  
賢賜新成長生殿名集靈臺以祀天神開廣運潭皇太子妃兄  
韋堅領江淮租庸轉運使是歲戶部管天下郡三百六十二縣  
一千五百二十八鄉一萬六千八百二十九戶八百五十二萬  
五千七百六十三口四千八百九十萬九千八百 二年春正  
月乙卯作昇仙宮丙辰追尊玄元皇帝爲大聖祖改兩京崇玄  
學爲崇玄館博士爲學士三月壬子親祀玄元廟取方士言尊  
父周上御大夫敬曰先天太上皇母益壽氏曰先天太后仍於  
譙郡立廟尊魯繇爲德明皇帝涼武昭王曰興聖皇帝改西京  
玄元廟爲太清宮東京爲太微宮天下諸郡爲紫極宮丙寅廣  
濟潭成盛陳舟艦上幸廣運樓觀之擢堅左散騎常侍夏六月  
甲戌夜雷震東京應天門災延至延福門火經日不滅冬無雪

十二月己亥改應天門爲乾元門乙酉安祿山入朝 三載春  
正月丙辰朔改年爲載間二月辛亥有星如月墜於東南作聲  
三月以安祿山兼范陽節度使庚午武威郡言耆禾縣天寶山  
有醴泉湧出嶺石化爲瑞甃堪取以食改名天寶縣夏四月海  
賊寇台州遣河南尹裴敦復南海太守劉巨鱗討平之秋八月  
丙午九姓拔悉密葉護攻殺突厥烏蘇米施可汗傳首京師冬  
十月癸巳幸溫泉宮命潛納太真於宮中號曰娘子十二月甲  
寅親祀九宮貴神於東郊大赦是歲令百姓十八已上爲中男  
二十三成丁每歲庸調八月起徵至九月畢 四載春正月上  
於宮中置壇爲百姓祈福自草黃素置案上俄飛昇天聞空中  
語云聖壽延長又以煉成藥置壇上及夜欲收空中語云藥未  
須收自有守護羣臣表賀二月丙戌王忠嗣及突厥戰于薩河

丙山敗之秋七月更爲壽王娶郎將韋昭訓女冊以爲妃八月  
甲辰冊太真楊氏爲貴妃贈其父玄琰兵部尚書以從兄鉅爲  
殿中少監釗爲金吾兵曹參軍錡爲駙馬都尉三姊皆賜第京  
師是月河南睢陽淮陽譙等八郡大水九月以韋堅爲刑部尚  
書楊慎矜租庸轉運使祿山欲希遷寵數侵掠奚契丹及是叛  
討破之隴右節度使皇甫惟明與吐蕃戰于石堡城不利副將  
褚直廉等死之冬十月改會昌縣爲同京縣置金河陰山二縣  
屬單于安北十二月以王鉷爲御史中丞京畿採訪使釗充判  
官 五載春正月癸酉貶惟明播州太守尋決死黔中拜王忠  
嗣河西隴右朔方河東四節度使夏四月庚寅李適之罷丁酉  
陳希烈同平章事五月壬子朔日食秋七月丙子林甫構韋堅  
等流臨封郡賜死甥及壻貶之聽皇太子離婚李適之貶宜春

太守仰藥而死九月壬子刻聖容置太清宮併像林甫希烈侍  
於側冬十月丁酉改臨淄爲濟南郡是歲贊善大夫杜有隣著  
作郎王曾左驍衛兵曹柳勣北海太守李邕淄川太守裴敦復  
皆爲林甫構殺 六載春正月丁亥享太廟戊子祀園丘大赦  
除絞斬刑決以重杖改嫁母服三載士過一藝以上皆詣京師  
罷立仗并馬省進馬官置三皇五帝廟以時享祭併章懷節愍  
惠莊惠文惠宣懿德興隱太子同爲一廟封中獄爲中天王南  
嶽爲司天王北嶽爲安天王河瀆爲靈源公濟瀆爲清源公江  
瀆爲廣源公淮瀆爲長源公三月戊戌安祿山兼御史大夫出  
入禁中爲貴妃兒自五月不雨至秋七月命諸司錄繫囚庚寅  
雨冬十月戊申改溫泉爲華清宮王忠嗣解河東朔方兩鎮任  
將軍董延光攻吐蕃石堡城久之不克十一月貶忠嗣漢陽太



守以哥舒翰代之林市王鉞又搆殺楊慎矜及兄慎餘弟慎名  
是歲安西四鎮節度使高仙芝及小勃律國戰敗之 七載春

正月仙芝入朝獻俘加開府儀同三司三月乙酉有神光照大  
同殿柱產玉芝羣臣請上尊號夏四月辛丑以高力士爲驃騎  
大將軍時天下無事上欲高居無爲悉以政事委李林甫力士  
諫不聽六月賜安祿山實封并鐵券秋八月己亥朔改千秋節  
爲天長節萬年縣爲咸寧縣冬十月庚午幸華清宮封貴妃姊  
爲韓泰號三國夫人楊釗判度支事一歲中領十五使十二月  
上在華清聞聖祖將降改朝元閣爲降聖閣會昌縣爲昭應縣  
山爲昭應山封山神玄德公立祠宇是歲哥舒翰築神威軍應  
龍城吐蕃不敢近青海 八載春正月甲申賜楊釗金紫京官  
各給錢絹以備春遊時州縣殷富倉廩充實釗令改鞮變爲輕

貨悉貯左藏恣上嬉悅引近臣縱觀取之三月朔方節度使張  
降丘於東受降城北築橫塞城夏四月咸寧太守趙奉璋告林  
甫二十罪杖而殺之天下皆言太平請銷兵器著作郎韋子春  
獨不可貶端溪尉五月林甫奏停折衝府上下魚書自此中國  
一無武備矣六月哥舒翰拔石堡城命改爲神武軍劍南索磨  
川新置都護府成賜名曰保寧丙寅大同殿又產玉芝上謁太  
清宮冊上聖祖尊號加大道二字高祖五廟皆加大聖二字太  
穆五后皆加順聖二字上尊號加應道二字丁卯御舍元殿受  
冊大赦天下自今每至禋祫並於太清宮聖祖前序昭穆山人  
李渾言太白山金星洞有帝福壽玉版石記命求得之乃封太  
白山神應公金星洞嘉祥公改華陽爲貞符縣秋八月戊子停  
別駕置長史冬十月特進何履光率十道兵以伐雲南 九載

春正月庚寅朔始受朝於華清宮諸貴戚爭進食令內侍姚思

藝檢校

凡木陸珍羞動數千盤一盤費中人十家之產

庚戌旱停封西嶽二月壬午楊

釗奏流御史中丞宋渾於嶺南坐以姦賊與吉溫謀傾林甫三

月庚戌改縣使爲獻納夏五月庚寅錄囚乙卯進封安祿山東

平郡王

節度使封王始此

秋七月己亥置廣文館八月祿山兼河北道

採訪處置使九月乙卯處士崔昌上五行應運曆言國家合承

周漢以土代火不合繼周隋間位詔於京城立周武王漢高祖

廟廢韓介鄆公求殷周漢後以爲三恪改幟旗皆赤黃色以符

土運冬十月山人王玄翼又言聖祖降于寶仙洞賜以妙寶真

符命張均等求之林甫等各請捨宅爲觀上悅十一月己丑改

太清宮及太廟告獻爲朝獻巡陵爲朝拜告宗廟爲奏昭告天

地爲昭薦十二月賜楊釗名國忠追復其舅張易之等官爵是

歲安祿山入朝上幸望春宮以待爲起第親仁坊入居之南詔  
反陷雲南都督張虔陀死之 十載春正月壬辰朝獻太清宮  
癸巳朝祭太廟甲午南郊大赦分遣嗣吳王祗等祭嶽瀆海鎮  
改傳國寶爲承天大寶二月祿山生日召入禁中用錦繒爲大  
襪祿使宮人裹以沐浴賜貴妃洗兒錢丁巳仍兼雲中太守河  
東節度使引吉溫爲副使委以軍務三月戊申高仙芝執突騎  
可汗及石國夏四月壬午劔南節度使鮮于仲通將兵六萬討  
雲南與王閣羅鳳戰于瀘川敗績大將王天運死之秋七月仙  
芝及大食戰于怛羅斯城敗績八月陝與廣陵郡皆大風運船  
焚溺數千艘丙辰武庫災燒器械四十七萬安祿山將三道兵  
六萬討奚契丹大敗獨與麾下十騎走冬十一月辛未幸楊  
國忠宅是歲李林甫兼領安北副大都護朔方節度使楊國忠

兼領劔南節度使 十一載春二月癸酉用楊國忠言罷禁惡  
錢三月奉信王阿布思與祿山同討奚契丹不協恐其害已叛  
歸漠北祿山懼不敢進丙午制自今遇朔望太廟每室薦牙盤  
食五日一開室門灑掃改吏部爲文部兵部爲武部刑部爲憲  
部將作爲大少二監夏四月王鉷謀逆賜死以楊國忠爲御史  
大夫兼京兆尹林甫請解朔方節制薦安思順代之八月己丑  
復幸左藏庫賜羣臣帛有差九月甲寅改諸衛士爲武士冬十  
一月乙卯李林甫死庚申楊國忠爲右相兼文部尚書薦吉溫  
爲御史中丞十二月哥舒翰安祿山安思順俱入朝上使高力  
士宴之於城東 十二載春二月癸未追削林甫在身官爵剖  
棺以庶人禮葬流其子岫及宗黨李復道等五十餘人夏五月  
復所廢三恪二王秋七月壬子勅天下齊民不得預鄉貢須補

國子學生方許貢舉八月京城霖雨出太倉粟減價糶與貧民  
令大理疏決囚徒冬十月戊申幸華清宮三夫人皆從十二月  
改橫密城爲天德軍 十三載春正月丁酉朔上受朝於華清  
宮之觀風樓乙巳祿山入朝拜左僕射賜實封千戶二月癸酉  
朝獻太清宮上立帝尊號曰大聖祖高上大道金闕玄元太皇  
大帝甲戌朝饗太廟上高祖尊號神堯大聖大光孝皇帝太宗  
尊號文武大聖大廣孝皇帝高宗尊號天皇大聖大弘孝皇帝  
中宗尊號太和大聖大昭孝皇帝睿宗尊號玄真大聖興孝皇  
帝乙亥御興慶殿受徽號曰開元天地大寶聖文神武孝德證  
道皇帝大赦改獻陵等五署爲臺令丞并文武各照品加爵賜  
階大酺三日戊寅冊楊國忠司空受日天雨黃土霑於朝服又  
超資肩授祿山將士爲將軍者五百餘人中郎將二千餘人三

月丙午御羅龍殿門張樂宴相臣文武以下各賜絹絲綾羅有  
差壬戌北庭都護程千里生擒阿布思獻于勤政樓下斬之夏  
五月癸惑守心五十餘日六月乙丑朔日食不盡如鉤劒南留  
後李宓攻南詔大敗被擒舉軍皆沒秋八月丁亥久雨東都渥  
洛漲漲漂沒一十九坊罷陳希烈以韋見素爲武部尚書同平  
章事闔中大饑出太倉米百萬石開十場賤糶以濟貧民是秋  
試四科制舉人于勤政樓策外加詩賦各一首制舉加詩賦始此是載  
戶部計見戶九百六十一萬九千二百五十四口五千二百八  
十八萬四百八十八 十四載春三月丙寅宴羣臣於勤政樓  
奏九部樂上賦柏梁體羣臣皆和癸未遣給事中裴士淹等巡  
撫河南河北淮南等道二月安祿山使副將何千年奏請蕃將  
三十二人以代漢將韋見素奏其必反決不可從不聽俄以其

子慶宗在京尚宗女有期手詔觀禮祿山辭疾不至秋七月表  
請獻馬三千匹每匹執轡夫二人各遣蕃將部送河南尹達奚  
珣疑有變奏令俟冬官自給夫無煩本軍上意稍寤冬十月壬  
辰幸華清宮甲午頒御注老子并義疏於天下十一月丙寅祿  
山反率蕃漢兵自幽州南向詣闕以誅國忠爲名上聞於行在  
拜郭子儀朔方節度使封常清范陽平盧節度使令詣東京募  
兵斷河陽橋始圖禦備戊寅還京誅安慶宗甲寅拜榮王琬爲  
元帥副以高仙芝募京城民十一萬號天武軍鎮陝十二月丙  
戌朔上御勤政樓臨送丁亥祿山陷靈昌郡渡河辛卯陷陳留  
甲午陷滎陽丙申封常清與戰武牢敗績奔陝令仙芝棄城保  
守潼關丁酉陷東京達奚珣叛降己亥常山太守顏杲卿起兵  
復趙魏等十四郡殺賊將李欽湊執何千年高邈送京師辛丑



詔皇太子統河隴兵副以哥舒翰守潼關甲辰子儀收賊將高秀巖于河曲辛亥榮王琬薨時河北郡縣皆已從賊上聞平原太守顏真卿等各起兵始驚嘆真源令張巡與單父尉賈贛合擊令狐潮軍聲大振 十五載春正月乙卯御宣政殿受朝祿山於東京僭號庚中以李光弼爲河東節度使轉李隨鎮河南許遠爲睢陽太守以討之壬戌賊將蔡希德史思明陷常山杲卿及履謙死之復陷魏郡廣平鉅鹿趙郡上谷博陵文安信都九郡進圍饒陽甲子加哥舒翰左僕射同平章事乙丑安慶緒犯潼關翰擊退之乙巳加真卿戶部侍郎嗣吳王祗河南都知兵馬事及賊將謝元同戰于陳留敗之二月丙戌光弼復常山沈安思義遂與子儀東出井陘及思明戰大破之丙辰誅賊黨安思順安元貞三月壬午拜光弼御史大夫轉鎮河北乙酉真

卿爲河北採訪使擊拔魏郡己亥改常山爲平山郡房山爲平  
山縣鹿泉爲獲鹿縣鹿城爲東鹿縣夏四月丙午來瑱爲潁川  
太守兼招討使光弼子儀又破思明於九門進拔趙郡五月戊  
午河南節度魯吳與賊將武令珣戰于渰水上大敗被執賊圍  
南陽詔嗣虢王巨山藍田出師往救賊解圍走六月癸未朔真  
卿破賊將袁知泰於堂邑河北招討賀蘭進明入收信都庚寅  
詔促哥舒翰將兵出關與賊將崔乾祐遇于靈寶西原戰敗死  
者十六七辛卯翰至潼關蕃將火拔歸仁執以降賊關門不守  
京師大駭河東華陰馮翊上洛等郡皆委城遁走甲午將謀幸  
蜀詔以親征爲言命崔光遠留守京城遣令誠掌宮闈管鑰隨  
獻于賊乙未凌晨上獨與貴妃并姊妹自延秋門出扈從惟國  
忠見素力士及太子親王妃主并皇孫以下未及平明渡便橋

國忠欲斷橋上思繼來者命緩之辰時至咸陽望賢驛官吏駭散無復俱頓亭午未進食有父老獻麪上欲得飯獻者相繼俄尚食持御膳至命頒給從官而後食是夕次金城縣吏民咸遣令魏方進男允招誘得智藏寺僧進芻粟行從方給丙申次馬嵬驛諸衛頓軍不進將軍陳玄禮奏誅國忠并賜貴妃死丁酉發馬嵬百姓扳皇太子因留不行戊戌次扶風軍士各懷去志至山醜言玄禮不能制會益州貢春綵上命悉置于庭召諸將與別日卿等陳力久矣今蜀路險狹恐難俱承甚知卿等不得別父母妻子朕亦不及親辭九廟卽宜分取各圖去就朕獨與子弟中官相隨言發涕出衆咸俯伏泣曰死生願從自此浪言稍息庚子以穎王璣爲劔南節度大使司勳郎中崔圓副之監察御史宋若思加中丞充置頓使常諤充巡閣道使並令先發

辛丑駕興夕次陳倉壬寅次散關分部下軍爲六命壽王瑁等  
前後左右相次分統丙午至河池郡國奏劄南歲稔民安儲供  
無闕上大悅卽拜中書侍郎同平章事充蜀郡長史知節度事  
以前華州刺史魏犀爲梁州長史時賊將孫孝哲已陷長安秋  
七月壬戌次益昌縣甲子次普安郡憲部侍郎房瑄入見與語  
甚悅拜吏部尚書同平章事丁卯詔皇太子充天下兵馬元帥  
統朔方河東河北平盧等兵馬收復兩京宋王璘等皆爲節度  
大使璘江陵都督統山南東江南西路并黔中盛王琦廣陵大  
都督統江南東并淮南河南等路豐王珙武威郡都督領河西  
隴右安西北庭等路中外尚未知車駕所向衆心惶駭及聞是  
詔遠近相慶庚午次巴西太守崔渙奉迎卽授門下侍郎同平  
章事羣兒素爲左相庚辰至蜀郡八月癸未朔御府衙肆赦癸

已靈武使至始知皇太子卽位丁酉受冊稱上皇改詔稱詰已  
亥臨軒冊命皇帝遣韋見素房琯崔渙等往使自今軍國大事  
先取皇帝處分然後奏知候克復兩京朕當怡神偃息明年收  
復兩京遣中使啖廷瑊奉迎冬十月丁卯發蜀郡十一月丙辰  
次鳳翔十二月丁未入京御大明宮舍元殿見百寮入居興慶  
宮後移幸西內之甘露殿崩之日壽七十八享國四十四年尊  
諡曰至道大聖大明孝皇帝廟號玄宗先是謁橋陵見金粟山  
崗有龍盤鳳翥之勢復近先塋謂侍臣曰吾千秋後宜葬此地  
得奉先靈不忌孝敬代宗追奉先旨葬于其地名曰泰陵

冊曰盛矣開元弼亮多賢因心載錫孝治光天天寶一變  
妖淫濁亂丘墟蕩覆流離屯難吁嗟一身若兩截塵鑒觀  
浩嘆撫卷懷人